

**Suliffeqarfinni tamani pilerisaarutit taamatuttaaq atuisunut allakkat sulluunniit nas-siunneqartartut pinngitsooratik aamma kalaallisut allagartaqartalernissaat pillugit Naalakkersuisut siunnersuuteqaqqullugit peqquneqarnissaannik Inatsisartut aalaja-
ngiiffigisassaattut siunnersuut
(Malik Berthelsen, Siumut)**

pillugu

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Ataatsimiititaliap suliarinninnermini ukuninnga kingullermik inuttaqarpoq:

Andreas Uldum, Demokraatit, siulittaasuugallartoq

Juliane Henningsen, Inuit Ataqtigiit

Ruth Heilmann, Siumut

Doris Jakobsen, Siumut

Jane Petersen, Inuit Ataqtigiit. Harald Biancomut, Inuit Ataqtigiinneersumut sinniisussaq

UKA2010-p nalaani ulloq 6. oktober siullermeerinerup kingorna ataatsimiititaliap siunnersuut misissorpaa.

Siunnersuutip siunertaa

Innuttaasunut saaffiginnissutit oqaatsit innuttaasut paasisinnaasaat atorlugit allassimanissaannik qulakkeerisumik Naalakkersuisut inatsisissatut siunnersuusiornissaat siunnersuuteqartup kissaatigaa.

Pingaartumik Nuummi allagarsiussat pilerisaarutillu amerlasuut danskisuinnaq allassimanerat siunnersuuteqartup innersuussutigaa. Aammattaaq tunisisup pisisullu akornanni allakkatigut isumaqatigiissutit amerlanersaat danskisut allassimanerat siunnersuuteqartup innersuussutigaa.

Siunnersuutip Inatsisartuni siullermeerneqarnera

Siunnersuummi pingaarnertut siunertarineqartut partiinit tamanit taperserneqarput aammalu siunnersuut Kultureqarnermut, Ilinniartitaanermut, Ilisimatusarnermut Ilageeqarnermullu A-

taatsimiititaliami suliarineqartussanngorlugu nassiunneqarnissaa tamanit isumaqatigineqarpoq.

Naalackersuisut aallaaviatigut siunnersuut isumaqatigaat akuersissutigineqarnissaalu inassutigalugu.

Ataatsimiititaliap siunnersuummik suliarinninnera

Ingerlatseqatigiiffinnit suliffeqarfinnullu namminersortunit pilerisaarutit, allagarsiussat, allakkat isumaqatigiissutillu siunnersuummi kisimik pineqartut ataatsimiititaliap siunnersuummut atatillugu paasimmagu ataatsimiititaliap aallarniutigalugu oqaatigissavaa. Kiisalu assersuutigalugu nioqqutissat nunanit allanit eqqussorneqartut allagartaat, nioqqutissat ilitsersuutitaat, oqaasinnaat (soorlu *"Pepsi - The choice of a new generation"*) assigisaallu siunnersuummi pineqanngitsut.

Taamaalilluni ataatsimiititaliap isumaqarpoq siunnersuut oqaatsinut politikki pillugu inatsisissatut siunnersuummut ataatsimiititaliap upernaakkut ataatsimiinnermi isumaliutissiissusiorfigisaanut attuumassuteqartoq.

Oqaatsinut politikki pillugu inatsisissatut siunnersuutitip oqaluuserineqarneranili oqaatsinut politikki pillugu inatsisissatut siunnersuut pissutsit marluk pissutigalugit aalajangersimanngippallaamik oqaasertaliorneqarsimanersoq oqallisigineqarpoq:

1. Pilerisaarutit allagartallu danskisuinnaq – illuatungaanullu - allassimappata taakku kalaallisut allassimasunik ilaqartinneqarnissaat pillugu suliffeqarfiit peqquneqarnissaanik inatsisissatut siunnersuut imaqaanngilaq.
2. Suliffeqarfinnit ingerlatseqatigiiffinnillu namminersortunit allakkat isumaqatigiissutillu oqaatsit innuttaasup atugai atorlugit allassimanissaat pillugu aalajangersakkanik inatsisissatut siunnersuut imaqaanngilaq.

Siunnersuut taaneqartunut taakkununga marlunnut attuumassuteqarpoq, taamaattumillu oqaatsinut politikki pillugu inatsisissatut siunnersuummik ataatsimiititaliap suliarinninnerani apeqqutit assingi pinngorput:

1. Siunnersuut aningaasaqarnikkut innuttaasunut suliffeqarfinnullu qanoq kinguneqassava?
2. Inatsit kikkunnut atuutsinneqassava qanorlu paasineqassava kiisalu inatsit qanoq anertutigissava?
3. Inatsit qanoq atuutsinneqassava?

Pingaartumik immikkoortumut 2 eqqarsaatigalugu ataatsimiititaliaq arlalinnik isumaliuteqarpoq. Sillimasiissutit aningaaserivimmilu taarsigassarsiat pillugit allassimasut innuttaasup oqaatsit atornerusai atorlugit allassimanissaannik innuttaasoq kissaateqarpat tamanna pissusissamisoortoq ataatsimiititaliaq isumaqarpoq. Peqatigiiffiit namminersortut nammineq piurmassusertik naapertorlugu sulinerminni aqqissuussatik pillugit allagarsiinerminni pilerisaanerminniluunniit oqaatsinik aalajangersimasunik atuinissamik peqquneqarnissaat ataatsimiititaliamit naapertuuttutut isigineqanngilaq. Killissaali sumiippa?

Taamaattumik namminersorlutik inuussutissarsiutilinnut – tassungalu minnerunngitsumik ilanngullugit inuussutissarsiummik ingerlataqartunut mikinernut – siunnersuut qanoq sunniuteqassanersoq immikkut misissorneqartariaqartoq ataatsimiititaliaq naliliivoq.

Kalaallit oqaasii ulluinnarni atugaassasut aamma kalaallit oqaasii taamaallaat pisortatigoortunik pisoqartillugu atorneqartussatut killiligaassannginnerannik siunnersuuteqartoq ataatsimiititaliap isumaqatigaa. Taamaattorli kalaallit oqaatsitta, pingaartumik nunani issittuni naggueqatitsinnut sanilliulluta arlalippassuartigut nukittuutut inissisimmammata ataatsimiititaliattaq erseqqissaatigerusuppa. Kalaallit oqaasii Kalaallit Nunaanni amerlanerussutillit oqaasiisut inissisimapput kinguaariillu akimorlugit oqaaserineqarlutik. Aamma kalaallisut allanneq erinarsornerlu ileqquuvoq nukittuumik atugaasoq tamannalu kalaallit oqaasiisa pingaartinneqarnerannut nukittorsarneqarannullu peqataasoq ataatsimiititaliaq naliliivoq.

Tamatumuunakkut suna tamarmi ajunngitsuusoq oqartoqanngilaq. Suli anginerusumik iliuseqartoqarsinnaavoq tamannalu naalakkersuinikkut pingaartinneqartariaqarpoq. Kalaallit oqaasiisa nukittorsarneqarnissaat minnerunngitsumillu ineriartortinneqarnissaat pingaaruteqarpoq. Nunarsuarmioqatigiittut inuuvugut oqaatsillu nutaat nunat allamiut oqaasiineersut kalaallisut oqalunnitsinni atugaalersarput kalaallit oqaasiinik naammaginartumik taarserlugit atorneqarsinnaasunik nassaassaqaanngimmat. Tamanna ataatsimiititaliap imminnermi akerlerinngilaa taamatut ingerlatsineq pissusissamisoormat. Taamaaqqaatanik kalaallit taaguusersuutaat soorlu annoraaq aamma kajak nunat allamiut oqaasiini atugaalersimapput. Kalaallilli oqaasiisa ineriartortinneqarnissaannut suliaqarnerunissaq siunertaralugu Oqaasileriffiup nukittorsarneqarnissaa sulissutigeqqullugu Ataatsimiititaliap Naalakkersuisunut kajumissaarutigaa.

Oqaatsinut politikki pillugu inatsisip allannguutissaatut siunnersuut 2011-mi ukiakkut ataatsimiinnermi saqqummiunneqartussanngorlugu misissuineramik suliat aamma suleqatit allat kattuffinnik tamatumunnga attuumassuteqartunik oqaloqatigiinnernik Naalakkersuisut ingerlatsissasut Naalakkersuisut akissuteqaatiminni oqaatigaat. Suliariniakkat ataatsimiititaliap nersualarpai tamatumunngalu tapersersuinini nalunaarutigalugu. Tamatumunnga peqatigitillugu isumaliutissiisummi matumani allassimasutut ataatsimiititaliap isumaliutersuutai isumaalu ilanngunneqassasut ataatsimiititaliap Naalakkersuisunut kajumissaarutigaa.

Pisortat suliassaqarfiat tamaat eqqarsaatigalugu ataatsimiititaliaq isumaqarpoq ajornartorsiutitut taaneqartunut inatsiseqareersoq. Taamaalilluni suliassat suliarineqartarnerat pillugu inatsimmi § 7-imi allassimavoq, Suliamik ingerlanneqartumut peqataasoq isummaminik ersersitsisinnaavoq, kissaatigigini kalaallit imaluunniit danskit oqaasii atorlugit sullinneqarumalluni. Taamatut isummamik ersersitsineq pisortaasup malittussaavaa. Nunani avannarlerni oqaatsit pillugit isumaqatigiissut nunani avannarlerni innuttaasut Nunani Avannarlerni tamani assinganik piginnaatitsivoq.

Siunnersuutip uuma akuersissutigineqarneratigut oqaatsit pillugit politikki atuuttoq nukittorsarneqassaaq tamannalu suliniutitut pitsaasutut ataatsimiititaliamit isigineqarmat Ataatsimiititaliap isumaqatigiittup nalilerpaa.


Ataatsimiititaliap inassuteqaatai

Siuliani oqaaseqaatit siullermeerinermilu oqaatigineqartut tunngavigalugit **ataatsimiititaliap isumaqatigiittup** siunnersuut **akuerineqassasoq** inassutigaa.


Taama oqaaseqarluni ataatsimiititaliap siunnersuut aappassaaniigassanngortippaa.




Andreas Uldum



Jane Petersen



Juliane Henningsen



Ruth Heilmann



Doris Jakobsen